

GÁLATAS

Pablo queédih ã túyat tútat

¹⁻² Weém, Pablo, biíhdih daacát tútutnit, yeéb Galacia baácdih jumni tútchinadih moón Jesúíhwādih wā wahna caá. Nihat wājeéh jumnit Jesúíhwābut yeebdíh ã túyat tútutna caá. Weém, Pablodih jíí Jesucristo ã níwip jí, áih túini doonádih wā naóh jib bohéat pínah niijná. Cáacwā weemdíh ã naáwát tútutcap jí. Obohjeéhtih, Jesucristo, Dios jwí íp caán wunnijidih boonanibut weemdíh ã níwip jí. Páant ã naáwát tútutni jumna, nin núodih yeebdíh wā daác wahna caá. ³ Dios jwí íp, jwí Maáh Jesucristobut yeebdíh oinit, ã túi teo wáaca naáh, ñi túi jummat pínah niijná. ⁴ Dios jwí íp ã náahat pahjeh, caán Jesucristoboó jwí yéejat jíib, át wun wūhup wut jí,* ã teo wáacatjíh yeejépwā ã jummat pah nihcan, yéej chájatdih jwí yap yohat pínah niijná. ⁵ Páant ã chájatdih jéihna, “Paá, meém nihatdih jéih beedáni jumna, cáacwādih jígah ennit, mapí túi teo wáacna caá”, jwí ípdih yeó jáap jummat pah búdí jwí níj wēi naáwát dée caá. Páant tíí jwí níj wēi naáwáp.

Dios cáacwādih ded pah ã túi ubat

⁶ Yeéboó ded pah ñi chájat doonádih joinít, weém búdí wā náhni dahwana caá. Dios yeebdíh búdí oina, át níwip taga, Jesúsdih jepahnit, áihwā ñi jummat pínah niijná. Obohjeéhtih, páant yeebdíh búdí ã oyochah yuhna, waícanjeh biíh bohéatdih joinít, Jesucristoboodíh cádahna caá ñi chájap. Páant ñi cádahat doonádih joinít, “¿Dépanih tigaá waícanjeh ã tútut nuúm?” níj jenah joinít, wā wūhi

* 1:4 Mt 20.28; Mr 10.45; 1Ti 2.6; Tit 2.14

bejep be. ⁷ Biquína ñi pebh jumnit, yeebdíh tac buugána, mácah bohénit, Jesúh tání doonádih í yéejana caá. Páant yeebdíh naóhna, nin pah í níj yee bohéna caá: “Túi ubnit jummat túut niijná, Jesucristodihjeh ñi túi jepahaá’, Pablo níj naóh bohéna, yeebdíh ã nih yána caá. Diosjeéh túi jummat túut niijná, jwí nuowã í naáwátjidihbut túi jepahat caá náahap”, íť níj yee naáwáp wut be. Obohjeéhtih, “Nin tání dooná caá”, í níj naóhniboó tání dooná yoobát nihcan caá. ⁸ Jwiít, Dioh ángel japmant jūóhni, yeebdíh jwí jwíh bohéátjidih mácah jwí bohénachah, jwiít dih Dios búdí peéh chájna, iiguípna ã waha naáh. ⁹ Wã naáwátji pah wã jwúb naóhbiipna caá, páant muntih: Yeebdíh jwí jwíh bohéát dih ñi túi jepahachah yuhna, det yeebdíh mácah í bohénachah, Dios queétdih búdí peéh chájna, iiguípna ã waha naáh.

¹⁰ Páant niijná, “Caánboo tígaá túi bohéni ã jumap”, weemdíh cáacwã í niiját dih wã bidcan caá. Obohjeéhtih, Diosboó weemdíh “Meém ma túi bohéna jĩ”, ã niiját dih-jeh caá wã náahap.* Cáacwádih weñáhnit bohéna, Cristoboodíh wãta weñacan tagaá. Pánih weñacan, caandíh teo wéhni wãta jumcan taga.

Cristo Pablodih ded pah ã túut nuumátji

¹¹ Wã déewã panihnitá, nindih ñi jéihyat pínah yeebdíh wã náah yacna caá: Wápí bohéni tání dooná cáacwã í jenah joyátjijeh nihcan beé. ¹² Ded cáac dih wã joiníi doonábut nihcan beé. Bita weemdíh í bohécan beé. Obohjeéhtih, Diosjeh weemdíh ded pah ã wúh ã jumat dih ã bohénap jĩ.

¹³ Jesucristodih wã jepahat pínah játih, jwiít judíowã jwí nuowã í naáwátjidih wã túi joí waadánap jĩ. Pánih túi joí waadáni wã jumachah, ded pah wã chájatji doonádih

* 1:10 1Ts 2.4

yeéb ñit joijí tagaá. Pánih jumnit, Jesúh wã Diosdih yap yohnit í jummatdih jenah joinít, eníhcan, búdí yeejép chājna, queétdih wã túi mao beedá bojíhip yuh jĩ.* ¹⁴ Jwĩ ñowã í naáwátjidih túi jepahíhna, weém biíc yoobó behnit chah wã túi bohénap jĩ.*

¹⁵⁻¹⁶ Obohjeéhtih, wã cáac jummat pínah játih, Dios weemdíh búdí oina, átát ñíojip taga, áih túini doonádih wã bohéat pínah niijná. Pánihna, yéejni wã jumuchah yuhna, ã náahni yeó jáapdih Jesús ã wahniji ã jummatdih weemdíh ã jéihyanap jĩ. Pánih jéihyanit, judíowã nihcannit pehb-
boó ã wahap jĩ, áih túini doonádih queétdih wã naáwát pínah niijná. Páant ã wahachah, “¿Ded pah tigaá weemdíh niij bohéat náah?” cáacwádih wã niij úúbh joí encap jĩ.* ¹⁷ Jesús áih túini doonádih naáwát túutnit maáta, wã játih ã ñíonit í jumuchah yuhna, Jerusalén tútchina queétdihbut míc wéhenadih wã bejcap jĩ. Caanná bej jwuhcanjeh, Dios ded pah weemdíh ã náah yacatdih jéihíhna, Arabia baác cáac wihcapboó caandíh úúbúdh wã bejep jĩ. Caánboó jumniiji Damasco tútchina wã jwúub juibínap jĩ, páant muntih.

¹⁸ Biíc peihcanni jópchi túttimah, Jerusalén tútchina Pedroh enedih wã bejep jĩ bæca.* Caanná chéne sem-anabitjeh wã jumap jĩ. ¹⁹ Jesús áih doonádih ã naáwát túutnit bita maátadih wã jwááhcap jĩ. Obohjeéhtih, Santiago jwĩ Maáh úúddih pohba wã jwááap jĩ. ²⁰ Páant wã daacáchah, wã naáwát yoobópdi ã jummatdih Dios ã jéihna cáá.

²¹ Túttimah, Siria baác, Cilicia baácnaabut naóh jibidih wã bejep jĩ. ²² Caanná wã jib bejchah, Judea baácboó

* 1:13 Hch 8.3; 22.4-5; 26.9-11 * 1:14 Hch 22.3 * 1:15-16 Hch 9.3-6;
22.6-10; 26.13-18 * 1:18 Hch 9.26-30

jumnit Jesúhwā weemdih ī jwāáh jwuhcap jī. ²³ Ded pah wā chājat doonádihjeh ítát joyóp tajī. “Játih jwiít Jesúhwādih yeejép chājna, túini doonádih jwiít dih cádahat túutniji buu caán doonádihjeh jwúub naóhna caá ā chājap, cáacwā Jesús dih ī jepahat pínah niijná”, ít niíj míc wéhenap wut jī. ²⁴ Páant wā túut numát doonádih joinít, “Paá, caandih mat túi teo wáacap taga”, Dios dih búdí ít niíj wēi naáwáp wut jī.

2

Cristo ā naáwát túutnit maáta Pablodih ī wēi jwāáát

¹⁻² Catorce jópchi túttimah, Diosboó weemdih Jerusalén tútchina ā bejat túutuchah, Bernabéjīh caanná wā jwúub bejep jī. Pánih bejna, Titodihbut jwī numah bejep jī.* Caánboó judío nihcanni, jwī nuowā ī wutat pah bóodcanni ā jumup jī. Caanná juibína, caánboó jumnit Jesúhwā ī maátajeh ī míc wáacachah, judíowā nihcannitdih túini doonádih ded pah wā bohéátdih queétdih wā naáwáp jī. Pánih naóhnit, ded pah wāpí bohéátdih queét ī túi jéihyatdih wā náah yacap jī. Pánih jéihcan, wā bohéátdih ī wēicah, wā tewat buudní āta jum taga. Obohjeéhtih, ded pah wā bohéátdih jéihnīt, ī túi weñep jī. ³ Páant wā naáwáchah wēi joiná, Tito bóodcanni ā jumuchah yuhna, “Meembút ma bóodat túutú”, caandih ī niijcáp jī. ⁴ Queét maáta bícdih jwī míc wéhe láa, jwiít Jesúhwā nihat bícdih jwī míc wáacachah, biquína “Jesús dih jepahnit jwī jumna caá”, niíj yeenitbut ít waadáp jī. Pánih waadnít, judíowā nihcannitdihbut ī bóodat túutup yuh jī. Obohjeéhtih, buu Jesúhwā jumna, jwī nuowā ī naáwátjidih jepahcan, Jesús dihjeh jwī túi jenah joiná caá. “Páant jwī chājachah, jwī ípboó jwiít dih ā túi enna caá”, jwī niíj

* 2:1-2 Hch 11.30; 15.2

jéihna caá. Páant niij jéihnit jwĩ jəm̄chah enna, jwiít dih j̄ihñat túut niijná, ded pah jwĩ ch̄aj̄atdih jéihñna, queét jwĩjeéh ít waadáp tajī. Pánih waadnit, jwĩ n̄owā ī naáwátji biíc yoobó jwiít dih ī jepah beedáat túut̄up yuh jī, páant m̄antih. ⁵ Páant ī w̄ut̄chah yuhna, túini doonádih ñi jéihyat pínah niijná, jwiítboó queétdih jwĩ jepahcap jī.

⁶ Pánihna, Jesúihwā ī maáta túini doonádih ded pah wā bohéatdih joinít, “Ma bohéat pahjeh tih judíowā nihcannitdih ma bohénaá”, niij naóhñit, weemdíh biíh w̄utatdih ī bohéat túutcap jī. Queét Jesúihwā ī maátadih “Queétboó chah jéihnit caá”, biquína ī niij jenah joyóchah yuhna, dedé pínah weemdíh nihcan caá. Diosboó nihatdih biíc yoobó ā jenah joiná caá.* ⁷ Queét ded pah wā bohéatdih túi wēinit, “Pedrodih jwiít judíowādih ā bohéat pínah niijná, Dios át ñíoip taga. Pánihat pah, Pablodihbut judíowā nihcannitboodíh át bohé jibat túut̄up taga”, ī míic niijíp jī. ⁸ Judíowādih Pedro ā bohénachah, Dios búdí át teo wáacap w̄ut jī. Weembút judíowā nihcannitdih wā bohénachah, Dios biíc yoobó ā teo wáacachah, queébt̄ut ī túi jepahap jī.

⁹ Pánihna, Santiago, Pedro, Juanjīh, Jesúihwā ī maáta yoobát, Dios weemdíh búdí ā teo wáacatjidih jéihnit, “Dios yoobópdih át ñío wahap taga, jwĩ déewā nihcannitdih ā naáwát pínah niijná”, ī míic niijíp jī. Páant niijnít, weemdíh Bernabédihbut búdí wēinit, “Jwĩ túi míic teo wáac jīh”, niijná, jwĩ míic m̄ej tewep jī. Pánih m̄ej teonit, “Yeéb jwĩ déewā nihcannitdih ñi bohéatji pah ñi túi naáwá. Jwiítboó jwĩ déewādihjeh jwĩ naóhbipna caá”, Santiagowā jwiít dih ī niijíp jī. “Páant tíí ā j̄əm̄ nah”, jwĩ míic niijíp jī. ¹⁰ Páant niijná, Jesúihwā moh yéejnitdih jwiít dih ī teo wáacat túut̄up jī. Weembút moh yéejnitdih

* 2:6 Dt 10.17

bádí jígah ennit, wǎpí teo wáacna caá. Páant niíj míic wéhe péanit, jwiít Antioquía tútchina jwí jwúub bejep jī.

Pablo Pedrodih ã jūihñat

¹¹ Túttimah, Pedrobut Antioquía tútchiboó ã juibínap jī. Obohjeéhtih, jwí pebhna juibíniji, yoobópdih ã chājcat peéh caandíh wā jūihñap jī. ¹² Nin pah ã chājap jī: Jwí nᵛowā “Jwiít judíowā bóodcannit biíc dih jwí jeéméchah ã túican caá”, ĩ niijátji ã jamuchah yuhna, Pedroboó jwí pebh jwíih juibína, jwí déewā nihcannit biíc dih ã túi míic wēp jwuhap jī.* Obohjeéhtih, biquína jwí déewā, Santiago ã chéenwāboó ĩ juibínachah ennit, jwí déewā nihcannitdih cádahnit, Pedroboó “Buu jwinít bóodat túut-nit weemdíh jūihná”, niijná, ĩjeéh ã jwúub míic wēpcap jī. ¹³ Páant ã yee buugúchah ennit, bita jwí déewābut caandíh míic jéih ennit, queétbody biíc yoobó ĩ cádahap jī. Bernabé yuh buca túi jéihni jamna yuhna, queét ĩ chājat biíc yoobó caanbút ã cádahap jī. ¹⁴ Pánih cádahnit, “Nihat Jesúsdihjeh jepahnitdih Dios biíc yoobó ã wēi enna caá”, ĩpí niíj bohéat pah queét ĩ cádahap jī. Páant ĩ cádahachah ennit, nihat Jesúihwā ĩ joyóchah, nin pah Pedrodih wā niíj jūihñap jī: “Meém judío jamna yuhna, Jesucristodih jepahna, jwí nᵛowā ĩ naáwátjidih ma túi jenah joí cádahap jī. Pánih cádahnit, judíowā nihcannit ĩ chājat pah queét biíc dih ma túi jeémp jwuhap be. Obohjeéhtih, buu queétdih cádahnit, jwí nᵛowā ĩ naáwátjidih ma jwúub jepahachah ennit, queét jwí déewā nihcannit nin pah ĩ niíj jenah joiná nacaá: ‘Pedro páant ã jwúub jenah joyóchah, queét judíowā ĩ nᵛowā ĩ naáwátjidih jwiít dihbut jepahat caá náahap’, ĩ niíj jenah joiná nacaá. Páant ma chājat ã túican caá”, Pedrodih wā niijíp jī.

Jesúsdih túi jenah joinít dih Dios ã wēi enat

* 2:12 Hch 11.2-17

¹⁵ Jwĩ ñuowã judíowãjeh ítát jumɯp tajĩ. Pánihna, jwiítbút ĩ jwĩmená judíowãjeh muntih jwĩ jumna caá. Pánih jumnit, Dios ã wutatdih jéihnit jwĩ jumna caá. Obohjeéhtih, queét judíowã nihcannit Diosdih ĩ jéihcan caá. ¹⁶ Pánihna judíowã jumna yuhna, caán wutatdih jwĩ jéih jepah beedácatdih jwĩ jéihna caá. Caandih jepahcat jíib “Queét túinit caá”, jwiítdih Dios ã niij encatdihbút jwĩ jéihna caá. Obohjeéhtih, Jesucristodihjeh túi jenah joinít jwĩ jepahat jíib, “Queét túinit caá”, Dios jwiítdih ã niij enna caá. Pánih jéihnit, jwiít judíowã yuhna, Jesucristodihjeh túi jenah joinít, jwĩ jepahap jĩ, “Queét túinit caá”, Dios jwiítdih ã niij enat pínah niijná. Jwiít cáacwã Moisés ã wutatjidih jéih jepah beedácanit míic jwĩ jumna caá. Pánihna, caandih jwĩ jepahcat jíib, “Queét túinit caá”, Dios ã niij encan niít. Caandih jéihnit, “Caán wutatdih jói waadánachah, Dios jwiítidih ã túi wēi enna caá”, jwĩ niij jenah joicán caá.*

¹⁷ Pánihna, Cristodih jepahnit, “Queét túinit caá”, Dios jwiítidih ã niij enat pínah niijná, caán wutatdih cádahna caá jwĩ chājap. Obohjeéhtih, páant jwĩ cádahachah ennit, bita jwĩ déewã caán wutatdih túi jepahat túutnitboó “Queét jwĩ déewã nihcannit pah yéej chājnit ĩ jumna caá”, jwiítidih ĩ niij jenah joiná caá. Páant ĩ niij jenah joyát pah jwiítbút jenah joinít, “Moisés ã wutatjidih cádahat túutnit, Cristo jwiítidih ã yéej chājat túutna caá”, jwĩta niij jenah joi tágaá. Obohjeéhtih, páant nihcan caá. Pánihna, “Jesucristodih jepahna, Moisés ã wutatjidih jwĩ cádahat jíib, yéejnit jwĩ jumna caá”, jwĩ niij jenah joicán caá. ¹⁸ Cáacwãdih nin pah wāpĩ niij naóh bohéna caá: “Diosjeéh túi jumíhna, jwĩ ñuowã ĩ naawátjidih jenah joicán, Jesucristoboodíhjih túi jenah joinít, jepahat caá

* 2:16 Sal 143.2; Ro 3.20,22

náahap”, wã niijná caá. Obohjeéhtih, páant niíj bohéniji jwúub túut nuumnít, “Diosjeéh túi jummat túut niijná, jwí nuowã ĩ naáwátjidih túi jepahat caá náahap”, niíj naóh bohéna, yéej chãjni yoobát wãta jum tagaá. ¹⁹ Moisés ã wutatjidih weémboó túi jepahcanni jumna, caandíh yap yohni wã jumna caá. Pánih yap yohni wã jummatdih jéihna, “Caandíh wã jepahcat jíib, Dios weemdíh ã wéi encan caá”, wã niíj jenah joiná caá. Páant niíj jenah joinít, Dios bíicdih túi jummat túut niijná, caán wutatdih jenah joí cádahnit, Jesucristoboodíhjih túi jenah joinít, wã jepahna caá. ²⁰ Caánboó weemdíh oinit, wã yap yohat peéh cruzboó ã wun wūhuchah, weembát ãjeéh bíicdih wūnni pah wã jumna caá. Pánih wūnni pah jumna, weém wã jenah joyátdihjih chãj cádahnit, Cristoboodíh túi jenah joinít, jepahna caá wã chãjap.* ²¹ Pánihna, “Dios jwiútdih búdí ã oyochah, Cristo ã wun wūhat dedé pínah nihcan caá”, wã niijcán caá. Obohjeéhtih, Dios ã wutatdih jepahat jíibjih ãjeéh jwí túi jumuchah, Cristo ã wun wūhat dedé pínah ãta nihcan tagaá.

3

Jesucristodihjih jepahat caá náahap

¹ Yeéb Galacia baácđih moón Jesúíhwã jenah joicánnit ñi jumna caá! Jesucristo cruzboó ã wun wūhat doonádih yoobópdih yeebdíh wã naáwáp jĩ. Páant wã naáwátđih ñi túi jepahachah yuhna, buu ¿Dépanih tigaá bitaboó yeebdíh mácah ĩ naáwáchah joinít, ñi jepah? ² Nindih wáát jenah joí en tigaá: ¿Moisés ã wutatjidih ñi jepahat jíib niít Túini Espíritu ñijeéh át jwíih jum? Nihcan caá. Obohjeéhtih, túini doonádih joiná, Cristodih túi jenah joinít, ñi jepahachah, ñijeéh át jwíih jumap be.

* 2:20 Fil 1.21

³ Túini Espíritu ã teo wáacatjĩh Cristodih ñi jwĩh jepahna yuhna, ¿Dépanih tibeé buu jwúub túut nuumnit, ñi jenah joyátjĩhjuh Moisés ã wutatjidih jepahna caá ñi chājap? Pánih chājna, jenah joicánnit ñi jumna caá. ⁴ Túini doonádih ñi jepahatji jíib dawá láa túini yeebdíh át yapjip tagaá. ¿Páant yeebdíh ã túi yapatjidih ñi quíib buudá níit? Oboh pohba páant yapna át chājjican tagaá. ⁵ ¿Ded pah ñi chājatji jíib tibeé Dios yeebdíh Túini Espíritudih át wūhji? ñi jenah joyóchah. Moisés ã wutatjidih ñi jepahat jíib nihcan, áih túini doonádih joinít, Cristodih ñi jepahat jíib, yeebdíh Túini Espíritudih át wūhup taga. Páant ã jumuchah, Jesucristodih ñi túi jepahat jíib cáacwā ĩ jéih chājca naáhdih Dios ã wēpatjĩh yeebdíh ã chāj júutat túutna caá.

Abraham Diosdih ã túi jenah joyát

⁶ Buu, jwĩ nuu Abraham ded pah ã chājatjidih jwĩ jenah joyát dée caá. Dios caandíh ã naáwátidih át túi jenah joyóp wut jĩ. “Meemdíh wā túi chājbipna caá”, Dios ã niijchah, ã túi jenah joyát jíib, “Caán Abraham túini caá”, Dios caandíh át níij enep wut jĩ.* ⁷ Pánihna, caán Diosdih ã túi jenah joyát pah, jwiítbút páant túi jenah joinít, Abraham ã jumená panihnit jwĩ jumna caá.* ⁸ Judíowā nihcannitbút Diosdih ĩ túi jenah joyóchah, “Queét túinit caá”, Dios ã níij enna caá. Páant ã níij enat pínahdih jéihna, Dios nin túini doonádih Abrahamdih játih átát naáwáp wut jĩ: “Weemdíh ma túi jenah joyát jíib nihah nin baácdih moondíh wā túi chājbipna caá”, át niijíp wut jĩ.* ⁹ Pánihna, Abraham caandíh ã túi jenah joyóchah enna, Dios caandíh ã túi chājatji pahjuh, buu láabút det Diosdih túi jenah joinítidih bíic yoobó ã túi chājbipna caá.

* 3:6 Gn 15.6; Ro 4.3 * 3:7 Ro 4.16 * 3:8 Gn 12.3

¹⁰ Obohjeéhtih, ded “Moisés ã wutattjidih jepahíhna, Dioíh wã jumbipna caá”, niíj jenah joinídhíh búdí peéh chãjat ã jumbipna caá. Nin pah Moisés ãt niíj daacáp tají: “Ded wã wutattjidih túi jepah beedáccannidih búdí peéh chãjat ã jumbipna caá”, ãt niíj daacáp tají.* ¹¹ Biíh naóh yapani nin pah ãt niíj daacáp tají: “Diosdih túi jenah joí, jepahnitboodíh ‘Queét túinit caá’, Dios ã niíj enbipna caá. Pánih jepahna, páantjeh Diosjeéh í túi jumbipna caá”, ãt niíj daacáp tají.* Páant ã niijátji yoobópdih ã jumuchah jéihnit, nindihbüt jwí túi jéihna caá: Ded Moisés ã wutattjidih ã jepahat jíib “Caán túini caá”, Dios ã niíj encan niít. ¹² “Ded Diosdih túi jenah joiní, ã jepahachah, ‘Caán túini caá’, Dios ã niíj enbipna caá. Ded weemdíh Dios ã wutat tútatjidih túi jepah beedánijeh Dios biícidih ã túi jumbipna caá”, Moisés ãt niíj daacáp tají.*

¹³ Jwiít niहत caán wutatdih jwí túi jéih jepah beedácah, jwiítdíh Dios ã peéh chãjbipna caá. Páant ã peéh chãjat jwiítdíh ã jumuchah ennit, Cristoboó caán ã peéh chãjat déedih jíib chãjnit, jwiítdíh ãt wun wühup wut jí. Caandíh cruzboó í péoh dodh mawat pínahdih jenah joinít, jon játih nin pah ít niíj daacáp tají: “Ded máa nahdih í mao yafhniboó búdí peéh chãjni ã jumbipna caá”, ít niíj daacáp tají.* ¹⁴ Páant í niíj daacátji pahjeh tih Cristo nin baácboó ã jumuchah, caandíh ãt yapap tají. Caandíh páant ã yapatji jíib, “Nin baácidih moondíh wã túi chãjbipna caá”, Abrahamdih ã niijátji pahjeh tih jwí déewã nihcannitdih Dios ãt túi chãjap taga. Páant Cristo ã wun wühuchah, caandíh túi jenah joinít, jwí jepahachah ennit, “Túini Espíritudih wíih cáacwãdih wã wühbipna caá”, ã niijátji pah jwiítdíh ãt wühup jí.

* 3:10 Dt 27.26 * 3:11 Hab 2.4 * 3:12 Lv 18.5 * 3:13 Dt 21.23

Dedé pínah tigaá Moisés ã wutajji

¹⁵ Wã déewã panihnitá, Dios jwĩ nwo Abrahamdih ded pah ã chãjatjidih yeéb ñi beh joyát pínah niijná, ded pah jwiít cáacwã jwĩpí chãjatdih yeebdíh wã náhniabipna caá. Jwiít biíhdih nin pah jwĩpí niíj naóhna caá: “Nin pah meemdíh wã chãjbipna caá”, jwĩ niijná caá. Páant jwĩ niijátjidih biíhboó ã jéih jwúub túut nuumcán niít. “Páant ã niijátji pah ã chãjcan niít”, bitaboó ï jéih niijcán niít.

¹⁶ Caán jwĩ niiját pahjeh muntih, Dios jwĩ nwo Abrahamdihbut nin pah át niíj naáwáp wut jĩ: “Weemdíh ma túi jenah joyát jíib, nihat baácdíh moondíh wã túi chãjbipna caá”, caandíh, ã jumadihbut át niijíp wut jĩ. Páant niijná, nihat ã jumená yoobát dihjeh niijná át chãjcap wut jĩ. Biíc ã jumá, túttimah bóo láa jumni Cristodih niijná át chãjap wut jĩ.* ¹⁷ Bwú yeebdíh wã túi jéihya naóhbiipna caá: Jwĩ nwo Abrahamjidih “Meemdíh wã túi chãjbipna caá”, Dios ã niiját túttimah, cuatrocientos treinta jópchi yapat túttimahna Moisésjidih át wutat túutap wut jĩ, áih cáacwã ï jepahat pínah niijná. Pánih wutna yuhna, “Abrahamdih wã jwíih niijátji pah, túut nuumcánjeh, biíc yoobó wã péabipna caá”, Dios át niijíp wut jĩ.* ¹⁸ Pánihna, Dios biícdih jwĩ túi jumá pínah Moisés ã wutatjidih jwĩ jepahat jíib nihcan caá. Páant ã jumachah nihna, Diosdih Abraham ã túi jenah joyát pah, caandíh jwĩ túi jenah joyát jíib áta nihcan tagaá. Obohjeéhtih, Diosdih Abraham ã túi jenah joyát pahjeh muntih, jwiítbut caandíh jwĩ túi jenah joyóchah, “Yeéb túinit caá”, Dios jwiít dih ã niíj enna caá.*

¹⁹ Páant ã jumachah, ¿dépanih tigaá Dios caán wutatdih át naóhji? Abrahamdih páant ã niijátji túttimah, caán wutatdih át naóhjip taga, jwiít cáacwã yéej chãjnit jwĩ

* 3:16 Gn 12.7 * 3:17 Ex 12.40 * 3:18 Ro 4.14

jumatdih jwĩ jéihyat pínah niijná. Abrahamdih Dios ã naáwátji túttimah, caán wutat jwiítidih át jumup jĩ, púú Abrahamji ã juma Cristo cáac jumnit, ã wun wũh láana. Dios ã wutatdih áih ángelwãboodih Moisésjidih át naóh yapaat túutup wut jĩ. Queét Moisésdih cáacwãdih ã jwúub naóh yapaat túutup wut jĩ.* ²⁰ Caán wutatdih Moisésdih ã naóh yapaat túutuchah, Dios caanjéh pohba cáacwãdih át naóhcap wut jĩ. Obohjeéhtih, “Meemdih túi chãjnit, ma jumajih nihát cáacwãdihbut wã túi chãjbipna caá”, Abrahamboodih niij naóhna, caanjéh páant át niij naáwáp wut jĩ.

Cristo nihát Moisés ã wutatjidih ã péaat

²¹ ¿Dios Moisésdih ã wutatjidih naóhna, Abrahamdih ã niijátjidih “Wã niijátji pah wã péacan niít”, niij niít át chãjap? Páant át niijícan tagaá. Abrahamdih ã niijátji pahjeh biíc yoobó ã péabipna caá. Dios biícidih túi jumat túut niijná, ã wutatdih jepahna, caán láa bácah, ã wutatjidih jwĩ túi jepah beedánachah, dedé peéh chãjat jwiítidih áta wihcan tagaá. ²² Obohjeéhtih, jwiít nihát cáacwã yoobó yéej chãjnit míc jumna, jwĩ yéejatdih jwĩ jéih cádahcatdih Dios naáwátboó ã naóhna caá. Páant jwĩ jumuchah, Diosdih Abraham ã túi jenah joyát pahjeh muntih, jwiítbut Jesucristodih jwĩ túi jenah joyóchah, jwiítidih Dios ã túi ubbipna caá.

²³⁻²⁴ Bunu láa, Dios biícidih túi jumat túut niijná, ã wahni Cristodih túi jenah joinít, jepahat caá náahap. Obohjeéhtih, Cristo ã jũúwát pínah jãtjih, Moisés ã wutatjidih túi jepahíhna yuhna, yéej chãjnit jumna, jwĩ jéih jepahcap jĩ. Páant jwĩ jepahcat jíib, Dios búdí ã peéh chãjnit pínah jwĩ jumup jĩ. Páant jwĩ jumatdih jéihnit, jwiítidih túi

* 3:19 Ro 4.13

ubni pínahdih jwī bidip jī. Pánih bidnit, Cristoíh túini doonádih joinít, caandíh jwī jepahap jī, “Queét túinit caá”, Dios jwiít dih ā niíj enat pínah niijná. ²⁵ Pánihna, Dios bícdih túi jumat túut niijná, buu Cristodih jwī túi jenah joiná caá. Páant jwī jumuchah, caán wutatboó jwiít dih bohéni panihni ā nihcan caá, buca. ²⁶ Jesucristodih jepahnit jumna, yeéb nihat Dios ā weh ñi jumna caá. ²⁷ Cristo ā wēpatjīh daabánit jumna, caán bícdih jwī jumuchah, “Wā wūúh ā jumat pahjeh tih yeebbút ñi jumna caá”, Dios jwiít dih ā niíj enna caá. ²⁸ Pánihna, Cristo bícdih jumna, chéne poómp jwī nihcan caá. Pánih bíc poómpjeh jumna, “ ‘Jwiít judíowā nihcannit, queét judíowādih mácah caá’, Dios ā niíj enna caá”, ñi niíj jenah joicá bojoó. Teo wūhnit, teo wūhnit nihcannitdihbut; neoná, yaáhdihbut “Nit mácah caá”, Dios ā niíj encan caá. Pánihna, yeéb nihat Cristoíhwā jumna, bíc poómpjeh tigaá ñi jumap. ²⁹ Cristoíhwā jumna, Abraham jūimená panihnit ñi jumna caá. Páant ñi jumuchah, Diosdih Abrahamji ā túi jenah joyát jíib caandíh ā niijátji pahjeh muntih, Jesús dih ñi túi jenah joyóchah, yeebdíhbut ā túi chāj bipna caá.

4

Teo wūhnit nihcan, Dios ā weh jwī jumat

¹⁻² Ded pah jwiít cáacwā bíh jwīpí chājatdihbut yeebdíh wā jwúub náhniabipna caá. Ded ā íp ā éemp wunat túttimah, áih bí déedih áih pínah ā jumuchah yuhna, páantjeh wébít ā jum jwuhuchah, caandíh en daonít í jéih yapa jwuhcan caá. Pánih bíboh jwuhcah, caandíh en daonít í niiját pah chājat caá náahap. Pánih jumna, teo wūhni pahjeh ā jumna caá. Obohjeéhtih, ā íp ā jenahatji láa ā juyúchah, áih pínahdih caanjéh ā bíboh bipna caá. ³ Pánihna, jwiít cáacwā Jesucristodih jwī jepahat pínah

játih, caán wébít panihnit jwī jum jwuhur jī. Pánih jum jwuhnit, jwī n̄owā ded pah ī naáwátjidih yap yohatdih úmna, jwīpí jepahap jī.*

⁴⁻⁵ Páant jwī jumuchah yuhna, ã jenahatji láa ã juyúchah, Dios ã wūúhdih nin baácna át wah bojjiip taga. Páant ã wah bojni jwī wūúh panihnijeh át cáac jumur wut jī. Judío wili caandíh mi weh jumuchah, Moisés ã wutatjidih caandíhbut túi jepahat át náahap wut jī. Jwiítboó caán wutatdih yap yohnit jwī jumuchah, ã weh yoobát jwī jummat pínahdíh náah yacna, Dios ã wūúhdih át wun wúhat túutur wut jī, jwī yéejat peéh chājat déedih ã jíib chājat pínah niijná. ⁶ Yeebbút ã weh ñi jumuchah, Dios wūúh Jesucristojeéh jumni Túini Espíritudih yeebdíhbut át wah bojop wut jī. Páant ñijeéh jumna, ã teo wáacachah, “Paá”, úmcanjeh Diosdih ñi jéih niijná caá. ⁷ Pánihna, ã weh jumna, buu teo wúhnit panihnit nihcan caá, buca. Páant ã weh yoobát ñi jumuchah, yeebdíh búdí ã túi chājbipna caá.*

Pablo Galacia baácđih moón Jesúhwāđih ã úm yacat

⁸ Jon játih yeéb Diosdih jéih jwuhcannit jumna, ñi pāpninadih túi jenah joinít, “Nin pah wā chājachah, caán weemdíh ã túi chājbipna caá”, ñipí niíj jenah joyóp yuh jī. Pánih chājnit, Dios yoobát ã teo wáacat pínahdíh bidcan, nemépwā ī teo wáacat pínahdíh bidna ñi chājap jī. Pánih chājna, queétdih teo wúhnit panihnit ñi jumur jī. ⁹ Pánih jumna yuhna, buu jwuh Dios yoobátđih ñi jéihyechah, caanbút yeebdíh ã jéihna caá. Páant caandíh jéihna yuhna, ¿Dépanihna buu cáacwā oboh ī jenah joyátjijeh ī naáwátđih ñi jwuh jepah? Pánih jepahna, Diosdih weñáihna yuhna, ñi bujácán niít. Páant ñi bujácát

* 4:3 Col 2.8,20 * 4:7 Ro 8.15-17

pínahdih jéihna yuhna, ¿Dépanihna ñi n̄owã ï naáwát dih yap yohatdih úumnit, teo wáhnit panihnit ñi jwáub jum?*

¹⁰ B̄uu Diosdih weñat túut niijná, nin pahbut ñi chājna yuh caá: Jwiít judíowã jwí n̄owã ï naáwátjidih jepahnit, jwí wēi láa ded pah jwípi chājat pah yeebbút biíc yoobó ñi chājna caá. “Pánih chājna, jwí túi jumbipna caá”, ñi niíj jenah joiná yuh caá. ¹¹ Páant ñi niíj jenah joyóchah, yeebdíh búdí úum yacnit, “Weém queétdih túini doonádih búdí wã bohénachah yuhna, ¿b̄uudní pínah niít át jumap?” wāpi niíj jenah joiná caá.

¹² Wã déewã panihnitá, ñijeéh jumna, yeebdíh bohé láa, weemdíh yeejép ñi chājcap jī. Pánihna, b̄uu biíc yoobó weemdíh yeejép chājcan, nin wã naáwát pínahdih ñi túi jepahaá: Yeebdíh bohénadih bejna, Moisés ã wutatjidih jenah joicán, Cristodihjeh yeebdíh wã jepahat túutap jī. Pánihna, b̄uu Cristodihjeh wã túi jenah joyát pah, yeebbút biíc yoobó ñi túi jenah joyoó. ¹³ Nindih ñi náhninaá: T̄ubit w̄unna, ñi pebhboó chāo jwáhnit, yeebdíh túini doonádih wã jwíih naáwáp jī.* ¹⁴ Páant w̄unni wã jumuchah yuhna, “Pablo dedé pínah nihcan caá”, niijcánjeh, yeéb weemdíh ñi bacat túutcap jī. Pánih bacat túutcan, Dioíh ángeldih, Jesucristodihbut ñi weñat pah, weemdíh ñi túi wēi jwāáap jī. ¹⁵ Pánih wēi jwāáhnit, nin pah ñi jummatjidih wã náhnina caá: Weemdíh búdí teo wáaquíhna, dedé wã náahatdih wáhnna, ñíih quíbnadih ñita wáat wáhn tagaá. Pánih wēinitji yuhna, ¿dépanih tigaá b̄uu wã wihcah, ñi weñatji ã bej? ¹⁶ Wã bohénitji jumna yuhna, ¿b̄uu yoobópdíh yeebdíh wã naáwátji jíib, weemdíh ñi en jūih niít? ¹⁷ Ñi pebhna juibínitboó “Búdí jwí teo wáacmi caá”, yeebdíh niijná yuhna, ï jenah joyátboó mácah ã jumna caá. Páant ï niijíchah yuhna, wã bohéatjidih, jwiít dihbut yeebdíh

* 4:9 Col 2.8,20 * 4:13 Hch 16.6

ĩ cádahat túutna caá. Pánih cádahnit, ĩjeéh jumnit, ĩ bohéatboodíh ñi jepahat pínahdih ĩ náah yacna caá. ¹⁸ Jwiít cáacwã bita ĩ túi bejat pínahdih yoobópdih náah yacachah, ãpí túina caá. Obohjeéhtih, páant niijná yuhna, mácah jwĩ jenah joyóchah, ãpí túican caá. Ñijeéh jumna, wãpí túi teo wáacap jĩ, ñi túi jummat pínah niijná. Bũũ ñijeéh wihcan yuhna, biíc yoobó ñi túi jummat pínahdih wã náah yacna caá. ¹⁹ Yeebdíh búdí wã oyochah, wã weh panihnit ñi jumna caá. Pánih oinit, yeebdíh búdí wã náhni dahwana caá. Pánih búdí mácah jenah joiná, yad wili mi weép jáaat pah tubani wã jumna caá. Pánih jumna, ded pah Cristo ã jummatji pah yeebbút ñi jummat pínahdih búdí wã náah yacna caá.* ²⁰ Butéh ñijeéh wã jumuchah, ãta túi tagaá. Pánih biícđih jumna, jũihcanjeh naóhñit, yeebdíh wã jéih míic wéhenachah, chah ãta túi tagaá. Obohjeéhtih, ninboó jumna, yeebdíh búdí mácah jenah joiná caá wã chãjap.

Agar Sarajĩh ded pah ĩ jummatji

²¹ Yeéb weemdíh ñi joi jwũhũũ. Biquína Diosjeéh túi jumíhna, jwiít judíowã jwĩ nuowã ĩ naáwátjidih ñi jepahna yuh caá. Caandíh jepahíhna yuhna, ded pah ĩ naóh daacátjidih ñi túi beh joicán caá. Pánih beh joicánnit ñi jumuchah, nin pah Moisés ã daacátjidih wã naóhbična caá, ñi túi beh joyát pínah niijná: ²² Abraham chénewã ãt weh jumup wut jĩ. Caandíh teo wũhñih Agar biíc mit wũhũh jumup wut jĩ.* ã áa yoobát Sarabut biíc mit wũhũh jumup wut jĩ.* ²³ Pánihna, caandíh teo wũhñihboó, jáap wili jumna, Ismael pínahdih mit weh jumup wut jĩ. Obohjeéhtih, “Majeéh bóli, Sara newé weépdih mi weh jumbična caá”, Dios Abrahamdih ã niijátji pahjeh,

* 4:19 Ro 8.29; 2Co 3.18; Fil 3.10

* 4:22 Gn 16.15

* 4:22 Gn 21.2

Saraboó tub beh wili jumna yuhna, Isaac pínahdih mit weh jumnap wut jī.

²⁴⁻²⁵ Queét chénewā yaáhdih ded pah ā yapatji jwiít dih ā tūi naóhna caá. Teo wūhnih Agardih jenah joinít, Arabia baácboó jumni Sinaí jeéboodíh jwī jenah joiná caá. Caán jeéboó Dios Moisésdih ā wutatjidih át wūhup wut jī, jwī nūowā ī tūi jepahat pínah niijná. Caán wutatdih jepahna, teo wūhnit pah it jumnap jī. Pánihna, Agar teo wūhnih mi jummat pah, jwiít cáacwā caán jeéboó ā wutatjidih jepahíhnit, jwiítbut teo wūhnit panihnit jwī jumna caá. Páant ā jumuchah, caán Sinaí jee pánihni teo wūhnih Agar mit jumnap jī. Pánihna, caánt teo wūhnih caán jee pánihnih mi jummat pah, buu Jerusalén tútchidih moón caán wutatdih jepahíhnit, mi jummená panihnit ī jumna caá. Pánih jumnit, queébtut biíc yoobó teo wūhnit panihnit jumna, Dios weh ī nihcan caá.

²⁶ Obohjeéhtih, teo wūhcannih Saraboodíh jenah joinít, “Majeéh bóli Sara newé weépdih mi weh jumnipna caá”, Dios Abrahamdih ā niijátjidih jwī náhnina caá. Pánihna, Abraham Dios ā niijátjidih ā tūi jenah joyátji pah, jwiítbut Cristodih tūi jenah joinít jumna, Sara mi jummená panihnit jwī jumna caá. Pánih jumnit, Dios pebhboó jumni jáap Jerusalén tútchidih moon pánihnit jwī jumna caá. ²⁷ Dios naáwátdih naóh yapani Isaías jwī éet Sara ded pah mi yapatjidih jenah joinít, nin baácboó jumni Jerusaléndih, jeáboó jumni Jerusaléndihbut ded pah ā yapat pínahdih Dios át jenah joyát tūatup jī. Caandíh jenah joinít, nin pah át niij daacáp tajī:

“Weh wihcannih, búdí ma wēi ñaacá. Weép jumna tubatdih jéihcannih jumna yuhna, ma weh jumnipna caá. Ma jummená dawá jumnit, meemdíh teo wūhnih mi jummená chah ī jumnipna caá. Pánihna, ma tūi weñeé”, át niij daacáp tajī. (Is 54.1)

Páant niíj daácnit, chah dawá mi j̄uimená ĩ j̄umat pínahdih naóhna, jeáboó j̄umni Jerusalén tútchiboó dawá Jesucristodih jepahnitji ĩ j̄umat pínahdih niíj naóhna át chājap tajī. Agardih Abraham ā yohat pah nin baácboó j̄umni Jerusaléndih ĩ yohat pínahdihbut niíj naóhna át chājap tajī.

²⁸ Pánihna, Dios ā niijátji pahjeh Sara wūh Isaac át cáac j̄um̄ur wut jī. Pánihat pah, “Weemdih ma túi jenah joyát jíib, nihat baácdih moondih wā túi chājbipna caá”, Dios Abrahamdih ā niijátji pah, Cristodih jepahnit ĩi j̄um̄uchah, yeebdihbut át túi chājap taga. ²⁹ Queét chénewā ā wehdih ded pah ā yapatjibut jwiít dih nin pah ā bohéna caá: Dios ā niijátji pahjeh Túini Espiritu ā teo wáacachah, Isaacji át cáac j̄um̄ur wut jī. Páant ā cáac j̄um̄uchah ennit, ā úud jeñé Ismaeljiboó caandih eníhcan, yeejép át chājap wut jī.* B̄ub̄ub̄ut ā chājatji pahjeh jwī ŋowā ĩ naáwátjidih jepahíhnitboó jwiít Cristodih jepahnitdih yeejép ĩpí chājna caá. ³⁰ Páant yeejép ĩ chājachah yuhna, Moisés nin pah ā niíj daacátjidih jwiít dih túi jenah joyát caá náahap: “Sara mi áa Abrahamjidih nin pah mi niijíchah, Dios át jepahat túutur wut jī: ‘Jwiít dih teo wūhnih wūh, Ismael, míih bí déedih ā jéih bíbohcan níit. Jwī wūh yoobát Isaacboó caandih ā bíbohhipna caá. Pánihna, jwiít dih teo wūhnihdih mi wūhjih biáboó ma bejat túutá’, mit niijíp wut jī”, Moisés át niíj daacáp tajī.* Páant ā niíj daacátjidih jenah joinít, jwiít Isaac panihnit jwī j̄um̄uchah, Dios caandih ā túi chājat pah, jwiít dihbut ā túi chājbipna caá. ³¹ Pánihna, wā déewā panihnitá, teo wūhnih Agar mi j̄uimená panihcan, teo wūhcannih Saraboó mi j̄uimená panihnit jwī j̄umna caá.

* 4:29 Gn 21.9 * 4:30 Gn 21.10

5

Teo wũhñit panihñit jwĩ jummatdih Cristo ã cádahat tútat

¹ Teo wũhñit panihñit jwĩ jumcat pínah niijná, Cristo jwiít dih ãt wun wũhup wut jĩ.* Páant ã wun wũhuchah, “Caandíh túi jenah joiná, Dios biíc dih wã túi jum bipna caá”, niijnít, caandíh ñi jepahap jĩ. Pániñ jepahñit, “Moisés ã wutatjidih wã túi jepahachah, Dios weemdíh ã túi enbipna caá”, ñi niij jenah joicá bojoó. Jesús dih cádahcanjeh, túi wẽp ñuhñit panihñit ñi jumúú. Pániñ jumñit, bita ï wutatdih jepahcanjeh, teo wũhñit panihñit ñi jwúub waadcá bojoó.

² Weém, Pablo, nindih wã naáwáchah, ñi túi jenah joyoó: “Bóodnit jumna, Diosjeéh jwĩ túi jum bipna caá”, niij jenah joinít, ñi míc bóodat tútuchah, Cristo yeebdíh ã wun wũhatji dedé pínah ãta nihcan tagaá. ³ Búutéh wã niiját pah, wã jwúub naóhbipna caá. Ded bóodat tút niboodíh niñat Moisés ã wutatjidihbut jepah beedáát caá náahap. ⁴ Diosjeéh túi jummat tút niijná, caán wutatdih túi jepahíñit jumna, yeebjéh Cristoboodíh ñi cádahna caá. Pániñ jepahíhna, Dios yeebdíh oinit, ã teo wáacatdihbut míc jáhna caá ñi chãjap.

⁵ Obohjeéhtih, jwiítboó Túini Espíritu ã teo wáacatjñh Cristodih jwĩ túi jenah joiná caá. Páant jwĩ túi jenah joyóchah, “Queét túinit caá”, jwiít dih Dios ã niij enna caá. Páant niij ennit, ã pebhboó jwĩ juibínachah, jwiít dih ã tút nuúm péabipna caá. Páant ã tút nuúm péanachah, túinit yoobát jwĩ jummat pínahdih jwĩ páina caá. ⁶ Pániñna, jwiít Jesucristoíh wã bóodnit jumna, bóodcannitbut jwĩ jumuchah, Dios jwiít dih biíc yoobó ã enna caá. Cristodih

* 5:1 Jn 8.32-36

túi jenah joiná, bitadih túi oinit, teo wáacnit jwĩ jumuchah ennit, Dios jwiít dih ã túi wēibipna caá.

⁷ Wã déewã panihnitá, yeéb Cristodih ñi túi jenah joyóp yuh jĩ. Obohjeéhtih, túini dooná yoobát dih ñi túi jenah joyóchah yuhna, ¿déhe tibeé yeebdíh cádahat túutni?

⁸ Dios yeebdíh ñíoniboó queétdih páant át naáwát túutcan tagaá. ⁹ Nindih ñi náhninaá: Búdí pan pínahdih ã paa béjat pínah niijná, bainíbit paáat túutnijeh ã náahna caá. Pánihat pah, wã túttimah jūóhnit, yeebdíh mácah ĩ bohénachah, daocánnit yuhna, dawá yeebdíh ĩ túut nuumát túutna caá.* ¹⁰ Obohjeéhtih, jwĩ Maáh Jesús dih wã túi jenah joyóchah, weemdíh weñanit, nin pah ã niíj jenah joyát túutna caá: “Jwĩ Maáh queétdih ã túi teo wáacnipna caá, queétdih mácah ĩ bohéatdih cádahnit, wã bohéatjidih yoobóp dih ĩ jwúub jenah joyát pínah niijná”, ã niijná caá. Obohjeéhtih, ded yeebdíh yéejaniboodíh Dios búdí ã peéh chājbipna caá.

¹¹ Wã déewã panihnitá, queét mácah naóhnit weemdíh nin pah ĩ niíj yeena caá: “ ‘Bóodat túutnit, Diosjeéh ñi túi jumbipna caá’, Pablo ãpí niíj naóh bohéna caá”, ĩ niijná yuh caá. Páant wã bohénachah nihna, queét weemdíh yeejép ĩta chājcan tagaá. Obohjeéhtih, cruzboó Jesucristo ã wun wūhatjidih wã bohéat peéh weemdíh ĩ jūihna caá.

¹² Pánihna, bóodat túutnitboó, yeebdíh yeejép ĩ chājat peéh, biáboó ĩ beje naáh.

Oina, wutatdihbut jwĩ jepahat

¹³ Wã déewã panihnitá, “Wã wutatdih jepahna, wajeéh ĩ túi jumbipna caá”, Dios yeebdíh ñíonit, át niíj jenah joicáp jĩ. Obohjeéhtih, watnit panihnit jumna, “Buu caán wutatdih jepahcan, ded pah yeejép wã jenah joyát dihjeh wã chājbipna caá”, ñi niíj jenah joicá bojoó. Páant

* 5:9 1Co 5.6

niij jenah joicánjeh, búdí oinit, ñi túi míic teo wáacá.*
 14 Moisésjiboó nin pah át niij wutur jī: “Meém míicjeh ma míic oyat pah, bitadihbut oinit, ma túi teo wáacá”, át niijp jī.* Pánihna, bitadih túi oina, nihat biíh ã wutatdihbut túi jepahna caá jwī chājap.* 15 Nuñúpwā ī míic chāacát pah, mácah bohénitdih joiná, yeebjéhbüt tūbit míic jūihna caá ñi chājap. Páant ñi chājatdih cádahcan, yeebjéh ñi míic yéjea beedábipna caá.

Túini Espíritu ded pah jwiít dih ã náah yacat

16 Nin pah yeebdíh wā niij wēp naóhna caá: Túini Espíritu ã teo wáacatjīh ded pah yeebdíh ã náah yacat pahjeh ñi túi jumna. Pánih jumna, yeejép ñi jenah joyát pah ñi chājcan níit. 17 Ded pah jwiítjeh yeejép jwī náahatdih chājna, Túini Espíritudih en jūihnit dée pah jwī jumna caá. Caán ã náah yacatdih chājna, jwī náahatboodíh jwī chājcan níit. Páant ã jumchah, ded pah yeejép jwī jenah joyát dihjeh chājcan, Túini Espíritu ã náah yacatdih chājat caá náahap.* 18 Túini Espíritu ded pah ã náah yacatdih chājnit jumna, “Diosjeéh wā túi jummat túut niijná, Moisés ã wutatjidih túi jepahat caá weemdíh náahap”, ñi niij jenah joicán caá.

19 Diosdih jepahcannitboó yeejép ī jenah joyát dihjeh chājnit, nin pah ī chājatdih jwiít nihat jwī jéihna caá: Yéej chājnit, yéej chājatdih jenah joinít, tíic jenah joicánjeh íí náah chājnit ī jumna caá. 20 “Nin weemdíh teo wáacni caá”, Dios yoobát nihcannidih niij wēinit, jióhnit, míic eníhcannit, míic jūihnit, bita ī bíbohatdih en ñinahnit, waícanjeh íijnit, bitadih teo wáacatdih jenah joicánjeh, queétjeh maáta pah jenah joinít ī jumna caá. Míic en jūihnit, tútchi wahnit, “Yeéb mácah moón caá”, niij en

* 5:13 Mt 20.26 * 5:14 Lv 19.18 * 5:14 Ro 13.8-10 * 5:17 Ro 7.15-23

jëihnit ï jumna caá. ²¹ Bitá ï túi jumuchah en íjnit, máihnit, máihñatdih yaádh metatdihbut bidnit, búdí babhbat dooná jumát joiná wëinit ï bejna caá. Pánihat caá yéej jenah joinít, ïpí chājna caá. Játih yeebdíh wā niiját pahjeh, buubut wā jwúb niij naóhna caá: Det pánih chājnit Dios ā maáh jumupboó ï jéih jumcan caá.

²² Obohjeéhtih, Túini Espíritu ā teo wáacatjñh nin pah jwí jumna caá: Dios jwiítidih ā oyatdih jéihnit, túi wëinit, jwiítbut bitadih jwí oina caá. Éumcan, túinijeh jwí jumna caá. Yójahcan, ded pah bita ï chājachah yuhna, queédih waícanjeh íjcan, túinijeh jwí jumna caá. Bitadih túi teo wáacnit, túi chājnit jwí jumna caá. Diosdih, cáacwādihtbut ded pah jwí niijátji bíic yoobó péanit jwí jumna caá. ²³ “Weém chah jéihni wā jumna caá”, jwí niijcán caá. Ded pah yeejép chājat jenah joyát ā jūwúchah yuhna, caandíh joyáh bojnit, jwí chājcan caá. Páant jwí chājachah ennit, “Moisés ā wutajjidih jepahcan, queét yeejép ï chājna caá”, det ï jéih niijcán caá. ²⁴ Jesucristoíhwā jumna, yeejép chājat jwí jenah joyátjidih jwí jepah cádahap jī.*

²⁵ Pánih cádahnit, Túini Espíritu ā náah yacatboodíh wëi jepahnit, jwí chājat dée caá.

²⁶ Pánih chājnit, “Wā déewādiht chah wā jéihna caá”, niij jenah joicánjeh, jwiítjeh jwí míic íjican, jwí déewā ï túi jumuchah ennit, jwí en íjca bojat dée caá.

6

Jesúíhwā ï míic teo wáacat

¹ Wā déewā panihnitá, ñi túi míic teo wáacá. Pánih míic teo wáacnit, bíic ñijeéh jumni ā túi chājcatdih ennit, Túini Espíritu ā teo wáacatjñh caandíh ñi túi míic wéhenaá, túut nuumnít, túinijeh ā jwúb chājat pínah niijná. Pánih teo

* 5:24 Ro 6.3-14; Gá 2.20; 6.14

wáacnit, yeéb míicjehbut ñi túi chãja chaáh, “Yeejépdih chãjné”, niijná. ² Ñijeéh jumnit yeejép ĩ yapachah enna, queétdih ñi teo wáacá. Pánih míic teo wáacna, Cristo ded pah ã náah yacatdih jepahna caá ñi chãjap.

³ “Bitá chah túi chãjni jumna, dedé teo wáacatdih wã náahcan caá”, ded niij jenah joiná, caanjéh míic yeena caá ã chãjap. ⁴ Ded pah ñi chãjatdih jenah joinít, “Nin túini caá. Caán yeejép caá”, niij jéihyat caá náahap. Pánih jéihna, ded pah ñi chãjat túini ã jumuchah, bitadih ded pah ã yapatdih jenah joicánjeh, ñi túi wëibipna caá. ⁵ Jesús jwiítdih ded pah ã náah yacatdih jepahna, jwí jepahcahbut jwiítjeh jwí ñíwat pínah ã jumna caá. Bitaboó jwiítdih ĩ jéih ñío wũhcan caá.

⁶ Det túini doonádih bohénitboó queétdih naóhndih ĩ túi teo wáaca naáh, dedé ã náahatdih ã bíbohat pínah niijná.

⁷ Ded pah jwí chãjatdih jenah joinít, nindih náhniat caá náahap: Jwiít cáacwáboó dedédih jwí momochah, caanjéh ã jwúub chíih jũúwúchah, caandíhjih jwí bíbohíipna caá. Túininadih ñíonit, jwí momochah, túini ã chíih jũóhíipna caá. Obohjeéhtih, yeejépnadih jwí momochah, túicanni ãta chíih jũóh tagaá. Pánihat pah, jwiít cáacwádhíbut bíic yoobó ã jumna caá. Ded pah jwí chãjachah, bíic yoobójih muntih jwiítdihbut ã yapbíipna caá. Ñi túi náhninaá, Dios nihat jéihndih jwí jéih tíohcan caá. Pánihna, “Weém wã túi chãjcatdih Dios ã encan caá”, ñi niij míic yeeca bojó.*

⁸ Ded ã weñat pínahdihjih chãjna, yeejép ã chãjachah, ã yéej chãjat jíib, iiguíipna ã bejbíipna caá. Obohjeéhtih, ded Túini Espíritu ã náah yacatboodíh jepahna, ã túi chãjat jíib, páantjeh Diosjeéh ã jumbíipna caá. ⁹ Dios ã jenahat láa, túi chãj cádahcan, túinidih jwí bíbohíipna caá. Páant jwí

* 6:7 Pr 22.8; Os 8.7

bíbohat pínahdih jéihnit, túi chāj chũcán, jwĩ cádahca boj jĩh.* ¹⁰ Dedé teo wáacatdih ĩ náahachah, jwĩ bũujáát pah bóo, nihat cáacwādh jwĩ túi chāj jĩh. Jwĩ déewā panihnit Jesúhwādh bácah, chah jwĩ míc túi teo wáacat dée caá.

Pablo naóh péanit, ã túyat tútat

¹¹ Nin núodih wā chéen ã daác wũhup be. Pánihna, nin péeni naáwátdih dahwani wā daacátdih ennit, “Pablojeh jwiítdih át daác wahap taga”, ñi niíf jéihbipna caá.

¹² Bũũ queét yeebdíh yee bohénitdih wā jwũub naóh-bipna caá. Queét yeebdíh bóodat túutnitboó jwĩ déewā queétdih ĩ wēi enat pínah niijná, páant ĩ bohéna caá. Jesús cruzboó ã wũn wũhatjidihjeh bohéna, queétdih jũihnit, jwĩ déewā yeejép ĩta chāj tagaá. Páant yeejép yapatdih náahcan, queét yeebdíh ĩ bóodat túutna caá. ¹³ Queét bóodat túutnitboó Moisés ã wũtatjidih túi jepah beedácan yũhna, yeebdíh caandíh jepahat túutnit, ĩ bóodat túutna caá. Bitá jwĩ déewā “Queétboó Gálatasdh moón Jesúhwādh ĩt túi bóodat túutup tagaá”, queétdih ĩ niíf wēi naáwát pínah niijná, páant ĩ bohéna caá. ¹⁴ Obohjeéhtih, cáacwā weemdíh ĩ túi wēi naáwát pínahdih weémboó wā bidcan caá. Pánih bidcan, jwĩ Maáh Jesucristo cruzboó ã wũn wũhatjidihjeh cáacwā ĩ wēi naáwát pínahdih wā náah yacna caá. Weemdíh ã wũn wũhuchah, nemép Dioíh nihcannitdih yeejép ã chājat túutuchah yũhna, weémboodíh ã bũujácan niít. Páant yeejép ĩ chājachah yũhna, wā en yaccan niít. ¹⁵ Jwiít Jesucristoíhwā jumna, Dios jwiítdih ã enechah, bóodnit, bóodcannitbut jwĩ jumuchah, bíic yoobó dedé pínah nihcan caá. Obohjeéhtih, túiniboodíh jwĩ túut nuumúchah ennit bácah, búdí yoobát ã wēi enna caá.*

* 6:9 2Ts 3.13 * 6:15 Jn 3.3-7; 2Co 5.17

¹⁶ Nin wā bohéátdih túi jepahnit, Diosjeéh úumcanjeh ñi túi jumúú. Dios yeebdíh jígah ennit, ã teo wáaca naáh. Biíc yoobó ã teo wáacat pínahdih nihát áihwādh wā náah yacna caá.*

¹⁷ Nin wā péé naáwátbit caá: Jwĩ Maáh Jesúsdi h teo wūhni wā jumát jíib, weemdíh ĩ pññat yahwítji páantjeh wíih bácahdih wā ðuoná caá. Páant yaoh ðuoní wā jumuchah ennit, “Pablo Jesúsíh túini doonádh Dios ã naáwát túutni nihcan caá”, weemdíh ĩ jwúub níj tac buugáca bojo naáh.

¹⁸ Wā déewā panihnitá, jwĩ Maáh Jesucristo yeéb nihát-dih búdí oinit, ã túi teo wáaca naáh. Páni h náah yacnit, yeebdíh búdí oinit, wā túyat túutna caá.

Páant bóojeh tigaá wā daacát.

Pablo

* 6:16 Sal 125.5; 128.6

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06
